

摘藻堂四庫全書薈要

子部

欽定四庫全書薈要

子部

御製律呂正義後編卷一百十一



詳校官王事臣陳木

欽定四庫全書薈要卷一萬一千四十七

子部

御製律呂正義後編卷一百十一

樂章考十九

鼓吹



漢

魏

晉

宋

齊

梁

隋

唐

歷代鼓吹樂章

案鼓吹之名其類不一有朝會道路所用者謂之鼓吹曲即後漢志言樂有四其三曰黃門鼓吹樂是也有軍中馬上所用者謂之橫吹曲即後漢志言其四曰短簫饒歌是也鼓吹與饒歌自是二樂其用亦異乃蔡邕言鼓吹者蓋短簫饒歌而俱以為軍樂且謂黃帝岐伯所作以建威揚德風敵勸士也則似漢人已合而一之矣周禮大司樂曰王師大獻則令奏愷

樂大司馬曰師有功則愷樂獻於社鄭康成曰兵樂曰愷獻功之樂也春秋晉文公敗楚於城濮左傳曰振旅愷以入司馬法曰得意則愷樂愷歌以示喜據鼓吹饒歌俱為軍樂殆即凱歌之遺也又宋書樂志曰雍門周說孟嘗君鼓吹於不測之淵說者曰鼓自一物吹自竽籥之屬非簫鼓合奏為一樂然則短簫饒歌原未名鼓吹也又劉瓛定軍禮曰鼓吹未知其始漢班壹雄朔野而有之鳴笳以和簫聲非八音也

騷人曰鳴箎吹竽是也據鳴笳和簫之云則合短簫
鐃歌與橫吹曲俱得通名為鼓吹無疑也但所用異
耳西京雜記曰漢大駕祠甘泉汾陰備千乘萬騎有
黃門前後部鼓吹是鼓吹為乘輿出入警嚴之樂也
晉中興書曰漢武帝時南越加置交趾九真日南合
浦南海鬱林蒼梧七郡皆假鼓吹東觀漢記曰建初
中班超拜長史假鼓吹麾幢又魏晉之世給鼓吹甚
輕牙門督將五校皆有之宋齊以後稍重焉且或以

為鹵簿葬儀是鼓吹為給賜臣下之樂也齊武帝時
壽昌殿南閣置白鷺鼓吹以為宴樂陳後主嘗遣宮
女習北方簫鼓謂之代北酒酣則奏之古今樂錄有
梁陳時宮懸圖四隅各有鼓吹樓鼓吹樓者昔蕭史
吹簫於秦秦人為之築鳳臺故鼓吹陸則樓車水則
樓船其在庭則以簨虞為樓梁又有鼓吹十二桱隋
又於桱下設熊羆羆豹騰倚承之以象百獸之舞是
鼓吹又為嬉戲燕私之樂尤用之失其正也總之此

樂起於漢二十二曲魏晉以來倣為之而易其名雖
馬端臨曰純乎雅頌之體然無論漢魏間無文王武
王之德業可繼雅頌即求作詩者周公固不可得召
穆公尹吉甫之流誰與嗣音者而謂同於雅頌豈其
然哉明王邦直曰其設施槩與正樂不同誠篤論也
因叙歷代鼓吹樂章如左

漢饒歌

案古今樂錄曰漢鼓吹饒歌十八曲字多譌誤一曰

朱鷺二曰思悲翁三曰艾如張四曰上之回五曰擁
離六曰戰城南七曰巫山高八曰上陵九曰將進酒
十曰君馬黃十一曰芳樹十二曰有所思十三曰雉
子班十四曰聖人出十五曰上邪十六曰臨高臺十
七曰遠如期十八曰石留又有務成玄雲黃爵釣竿
亦漢曲也其辭亡或云漢饒歌二十一無釣竿擁離
亦曰翁離鄭夾漈曰上之回聖人出君子之作也雅
也艾如張雉子班野人之作也風也馬端臨曰漢明

帝之樂凡四今所傳者惟短簫鉦歌二十二曲而所謂大予雅頌黃門鼓吹則未嘗有樂章至於短簫鉦歌史雖以為軍中之樂多叙戰陣之事然以其名義考之若上之回則巡幸之事也上陵則祭祀之事也朱鷺則祥瑞之事也艾如張巫山高釣竿篇之屬則又各指其事而言非專為戰伐也今於務成玄雲黃爵釣竿外錄其詞之存者凡十八章

案漢樂既古工人亦久而失傳魏武平荊州方得杜

夔一人則其譜相傳轉寫承譌簡脫文殘理所不免
故饒歌十八章中平易可通者固有而聲牙不可句
者亦復不少古今樂錄云字多譌誤又云魏時以遠
期承元氣海淡淡為不通利故省之是前人久已闕
疑今亦就可句者句之不可句者闕之姑從春秋盟
密夏五郭公之例云

朱鷺

案通考註云鷺惟白色漢有朱鷺之祥因而為

詩又案儀禮大射儀曰建鼓在阼階西南隋書
樂志曰建鼓殷所作又棲翔鷺於其上不知何
代所加或曰鵠也取其聲揚而遠聞或曰鷺鼓
精也或曰皆非也詩云振振鷺鷺于飛鼓咽咽
醉言歸言古之君子悲周道之衰頌聲之息飾
鼓以鷺存其風流又孔穎達曰楚威王時有朱
鷺合沓飛翔而來舞舊鼓吹朱鷺曲是也案朱
鷺之祥或謂漢或謂楚雖未可定然飾鷺於鼓

而名曲明甚宋何承天朱路篇曰朱路揚和鸞
翠蓋曜金華但盛稱路車之美與漢曲異矣

朱鷺魚以烏路訾邪鷺何食食茹下不之食不以吐將

以問誅一作諫者

思悲翁

案此題舊無注者今亦從闕下仿此

思悲翁唐思奪我美人侵以遇悲翁也但我思蓬首一作

蕞狗逐狡兔食交君梟子五梟母六拉沓高飛暮安宿

艾如張

案艾與刈同說文曰芟草也如讀為而猶春秋
星隕如雨也古詞曰艾而張羅又曰雀以高飛
奈雀何穀梁傳曰艾蘭以為防置旃以為轅門
謂因蒐狩以習武事也蘭香草也言艾草以為
田之大防是也若陳蘇子卿云張機蓬艾側唐
李賀云艾葉綠花誰剪刻俱失古題本意

艾而張羅夷於何行成之四時和山出黃雀亦有羅雀

以高飛奈雀何為此倚欲誰肯礫室

上之回

案漢書曰孝武十四年匈奴入朝那蕭關遂至
彭陽使騎兵入燒回中宮候騎至雍甘泉蓋回
中地在安定其中有宮也武帝紀曰元封四年
冬十月行幸雍祠五時通回中道遂北出蕭關
吳兢樂府解題曰漢武通回中道後數出遊幸
焉沈建廣題曰漢曲皆美當時之事案其歌稱

帝遊石關望諸國月支臣匈奴服蓋誇時事也
石關宮闕名近甘泉宮相如上林賦云歷石關
歷封巒是也

上之回所中益夏將至行將北以承甘泉宮寒暑德游
石關望諸國月支臣匈奴服令從百官疾驅馳千秋萬
歲樂無極

擁離

案擁離或作翁離

擁離趾中可築室何用葺之蕙用蘭擁離趾中

戰城南

戰城南死郭北野死不葬烏可食為我謂烏且為客豪
野死諒不葬腐肉安能去子逃水深激激蒲葦冥冥梟
騎戰鬪死驚馬徘徊鳴梁築室何以南梁何北禾黍而
穫君何食願為忠臣安可得思此良臣良臣誠可思朝
行出攻暮不夜歸

巫山高

案樂府解題曰古詞言江淮水深無梁可度臨
水遠望思歸而已若齊王融想像巫山高梁范
雲巫山高不極雜以陽臺神女之事無復遠望
思歸之意也又有演巫山高不詳所起

巫山高高以大淮水深難以逝我欲東歸害梁不為我
集無高曳水河梁湯湯回回臨水遠望泣下沾衣遠道
之人心思歸謂之何

上陵

案古今樂錄曰漢章帝元和中
有宗廟食舉六曲加重來上陵二曲為上陵食舉後漢書禮儀志曰正月上丁祠南郊北郊明堂高廟世祖廟謂之五供禮畢以次上陵西都舊有上陵東都之儀太官上食太常樂奏食舉案古詞大略言神仙事不知與食舉曲同否宋何承天上陵者篇曰上陵者相追攀但言升高望遠傷時怨歎而已

上陵何美美下津風以寒問客從何來言從水中央桂
樹為君船青絲為君竿木蘭為君櫂黃金錯其間滄海
之雀赤翅鴻白鴈隨山林乍開乍合曾不知日月明醴
泉之水光澤何蔚蔚芝為車龍為馬覽遨遊四海外甘
露初二年芝生銅池中仙人下來飲延壽千萬歲

將進酒

案古詞曰將進酒乘大白大略以飲酒放歌為
言宋何承天將進酒篇曰將進酒慶三朝備繁

禮薦嘉肴則言朝會進酒且以濡首荒志為戒
若梁昭明太子云洛陽輕薄子但叙遊樂飲酒
而已

將進酒乘大白辨加哉詩審博放故歌心所作同陰氣
詩悉索使禹良工觀者苦

君馬黃

案古詞君馬黃臣馬蒼二馬同逐臣馬良終言
美人歸以南以北駕車馳馬令我心傷但取第

一句以命題其主意不在馬也

君馬黃臣馬蒼二馬同逐臣馬良易之有驄蔡有赭美人歸以南駕車馳馬美人傷我心佳人歸以北駕車馳馬佳人安終極

芳樹

案樂府解題曰古詞中有云妬人之子愁殺人君有他心樂不可禁若齊王融相思早春日謝朓早翫華池陰但言時暮衆芳歇絕而已

芳樹日月君亂如於風芳樹不上無心溫而鵲三而為
行臨蘭池心中懷我悵心不可匡目不可顧妬人之子
愁殺人君有他心樂不可禁王將何似如孫如魚乎悲
夫

有所思

案通考有所思亦曰嗟佳人古今樂錄漢太樂
食舉十三曲第七曰有所思不知與此同否若
齊王融如何有所思梁劉繪別離安可再但言

離思而已宋何承天有所思篇曰有所思思昔
人曾閔二子善養親則言生罹荼苦哀慈親之
不得見也

有所思乃在大海南何用問遺君雙珠璫瑁簪用玉繚
之聞君有他心拉雜摧燒之摧燒之當風揚其灰從今
以往勿復相思相思與君絕鷄鳴狗吠兄嫂當知之妃
呼狶秋風肅肅晨風颼東方須臾高知之

雉子班

案樂府解題曰古詞云雉子高飛止黃鵠飛之
以千里雄來飛從雌視若梁簡文帝姑場時向
隴但咏雉而已宋何承天有雉子遊原澤篇則
言避世之士抗志清霄視卿相功名猶冰炭之
不相入也

雉子班如此之千雉梁無以吾翁孺雉子知得雉子高
蜚止黃鵠蜚之以千里

一作重

王可思雄來蜚從雌視子

趨一雉雉子車大駕馬

一無馬字

滕被王送行所中堯羊蜚

從王孫行

聖人出

聖人出陰陽和美人出遊九河佳人來駢離哉何駕六
飛龍四時和君之臣明護不道美人哉宜天子免甘星
筮樂甫始美人子含四海

上邪

上邪我欲與君相知長命無絕衰山無陵江水為竭冬
雷震震夏雨雪天地合乃敢與君絕

臨高臺

案樂府解題曰古詞言臨高臺下見清水中有黃鵠飛翻關弓射之以卜主壽之意若齊謝朓千里常思歸但言臨望傷情而已宋何承天臨高臺篇曰臨高臺望天衢飄然輕舉凌太虛則言超帝鄉而會瑤臺也

臨高臺以軒下有清水清且寒江有香草目以蘭黃鵠高飛離哉翻關弓射鵠令我主壽萬年牧中吾

一作吉

遠如期

案遠如期亦曰遠期宋書樂志有晚芝曲沈約言舊史云詒不可解疑是漢遠期曲也古今樂錄曰漢太樂食舉十三曲一曰鹿鳴二曰重來三曰初造四曰狄安五曰來歸六曰遠期七曰有所思八曰明星九曰清涼十曰涉大海十一曰大置十二曰承元氣十三曰海淡淡魏時以遠期承元氣海淡淡三曲為不通利故省之

遠如期並如壽處天左側大樂萬歲與天無極雅樂陳
佳哉紛單于自歸動如驚心虞心大佳萬人還來謁者
引鄉殿陳累世未嘗聞之增壽萬年亦誠哉

石留

石留涼陽涼石水流為沙錫以微河為香向始蘇冷將
風陽北逝肯無敢與於揚心邪懷蘭志金安薄北方開
留離蘭

務成

玄雲

黃爵行

釣竿篇

以上四章古今樂錄曰亦漢曲也其詞亡謹依三百篇逸詩之例存其名云案釣竿篇崔豹古今注云釣竿者伯常子避仇河濱為漁者其妻思之而作也每至河側輒歌之後司馬相如作釣竿詩遂傳為樂曲據此故有漢饒歌二十一無釣竿之說

魏鼓吹曲

案魏武帝平荊州獲漢雅樂郎河南杜夔使創定雅樂又有散騎常侍鄧靜尹商善訓雅樂歌師尹胡能歌宗廟郊祀之曲舞師馮肅服養曉知先代諸舞夔悉總領之遠詳經籍近採故事考會古樂始議軒懸鐘磬而鼓吹十二曲則使繆襲造焉晉書樂志曰魏明帝使繆襲造鼓吹十二曲以代漢曲一曰楚之平二曰戰滎陽三曰獲呂布四曰克官渡五曰舊邦六

曰定武功七曰屠柳城八曰平南荆九曰平關中十
曰應帝期十一曰邕熙十二曰太和凡十二章

楚之平

案晉書樂志曰言魏代漢也代漢朱鷺古今樂
錄作初之平凡三十句句三字

楚之平義兵征神武奮金鼓鳴邁武漢揚洪名漢室微
社稷傾皇道失桓與靈閭官熾羣雄爭邊韓起亂金城
中國擾無紀經赫武皇起旗旌麾天下天下平濟九州

九州寧創武功武功成越五帝邈三王興禮樂定紀綱
普日月齊輝光

戰滎陽

言曹公代漢也代漢思悲翁凡二十句其十八
句句三字二句句四字

戰滎陽汴水陂戎士憤怒貫甲馳陳未成退徐榮二萬
騎塹壘平戎馬傷六軍驚勢不集衆幾傾白日沒時晦
冥顧中牟心屏營同盟疑計無成賴我武皇萬國寧

獲呂布

言曹公東圍臨淮生擒呂布也代漢艾如張凡
六句其三句句三字三句句四字

獲呂布戮陳宮焚夷鯨鯢驅騁羣雄囊括天下運掌中
克官渡

言曹公破袁紹於官渡也代漢上之回凡十八
句其九句句四字一句五字八句句三字

克紹官渡由白馬僵屍流血被原野賊衆如犬羊王師

尚寡沙塹旁風飛揚轉戰不利士卒傷今日不勝後何
望土山地道不可當卒勝大捷震冀方屠城破邑神武
遂章

舊邦

言曹公勝袁紹於官渡還譙收藏死亡士卒也
代漢擁離凡十二句句其六句句三字六句句四
字

舊邦蕭條心傷悲孤魂翩翩當何依遊士戀故涕如摧

兵起事大令願違傳來親戚在者誰立廟置後魂來歸
定武功

言曹公初破鄴武功之定始於此也代漢戰城
南凡二十一句其五句句三字三句句六字十
二句句四字一句五字

定武功濟黃河河水湯湯旦暮有橫流波袁氏欲衰兄
弟尋干戈決漳水水流滂沱嗟城中如流魚誰能復顧
室家計窮慮盡求來連和和不時心中憂戚賊衆內潰

君臣奔北拔鄴城奄有魏國王業艱難覽觀古今可為
長歎

屠柳城

言曹公越北塞歷白檀破三郡烏丸

一作桓

於柳

城也代漢巫山高凡十句其三句句三字三句
句四字三句句五字一句六字

屠柳城功誠難越度隴塞路漫漫北踰岡平但聞悲風
正酸蹋頓授首遂登白狼山神武懋海外永無北顧患

平南荊

言曹公南平荊州也代漢上陵凡二十四句其
十七句句五字四句句三字三句句四字

南荊何遼遼江漢濁不清菁茅久不貢王師赫南征劉
琮據襄陽賊備屯樊城六軍廬新野金鼓振天庭劉子
面縛至武皇許其成許與其成撫其民陶陶江漢間昔
為大魏臣大魏臣向風思自新思自新齊功古人在昔
虞與唐大魏得與均多選忠義士為喉脣天下一定萬

世無風塵

平關中

言曹公征馬超定關中也代漢將進酒凡十句
句三字

平關中路向潼濟濁水立高墉關韓馬離羣凶選驍騎
縱兩翼虜崩潰級萬億

應帝期

言文帝以聖德受命應運期也代漢有所思凡

二十六句其一句三字二句句四字二十二句

句五字一句六字

應帝期於昭我文皇歷數承天序龍飛自許昌聰明昭
四表恩德動遐方星辰為垂耀日月為重光河洛吐符
瑞草木挺嘉祥麒麟步郊野黃龍遊津梁白虎依山林
鳳凰鳴高岡考圖定篇籍功配上古羲皇羲皇無遺文
仁聖相因循期運三千歲一生聖明君堯授舜萬國萬
國皆附親四門為穆穆教化常如神大魏興盛一作聖與

之為鄰

邕熙

言魏氏臨其國君臣邕穆庶績咸熙也代漢芳
樹凡十五句句其六句句三字三句句四字一句
二字三句句五字二句句六字

邕熙君臣念德天下治登帝道獲瑞寶頌聲並作洋洋
浩浩吉日臨高臺置酒列名倡歌聲一何紆餘雜笙簧
八音諧有紀綱子孫永建萬國壽考樂無央

太和

言明帝繼體承統太和改元德澤流布也代漢
上邪凡十三句其二句句三字五句句五字三
句句四字三句句七字

惟太和元年皇帝踐祚聖且仁德澤為流布災蝗一時
為絕息上天時雨露五穀溢田疇四民相率遵軌度事
務徵清天下獄訟察以清元首明魏家如此那得不太
平

晉鼓吹曲

案晉書樂志曰武帝受禪乃令傳立製鼓吹曲二十
二篇以述功德代魏一曰靈之祥二曰宣受命三曰
征遼東四曰宣輔政五曰時運多難六曰景龍飛七
曰平玉衡八曰文皇統百揆九曰因時運十曰惟庸
蜀十一曰天序十二曰大晉承運期十三曰金靈運
十四曰於穆我皇十五曰仲春振旅十六曰夏苗田
十七曰仲秋獮田十八曰順天道十九曰唐堯二十

曰玄雲二十一日伯益二十二日釣竿凡二十二章
靈之祥

案晉書樂志曰改朱鷺為靈之祥言宣帝之佐
魏猶虞舜之事堯既有石瑞之徵又能用武以
誅孟達之逆命也凡三十句

靈之祥石瑞章旌金德出西方天降命授宣皇應期運
時龍驤繼大舜佐陶唐讚武文建帝綱孟氏叛據南疆
追有扈亂五常吳寇勁蜀虜彊交誓盟連遐荒宣赫怒

奮鷹揚震乾威曜電光陵九天陷石城梟逆命拯有生
萬國安四海寧

宣受命

改思悲翁為宣受命言宣帝禦諸葛亮養威重
運神兵亮震怖而死也凡十二句

宣受命應天機風雲時動神龍飛禦諸葛鎮雍梁邊境
安夷夏康務節事勤定傾攬英雄保持盈淵穆穆赫明
明沖而泰天之經養威重運神兵亮乃震斃

一作死

天下

寧

征遼東

改艾如張為征遼東言宣帝陵大海之表討滅
公孫淵而梟其首也凡十句

征遼東敵失據威靈邁日域公孫既授首羣逆破膽咸
震怖朔北響應海表景附武功赫赫德雲布

宣輔政

改上之回為宣輔政言宣帝聖道深遠撥亂反

正網羅文武之才以定二儀之序也凡十九句
宣皇輔政聖烈深撥亂反正從天心網羅文武才愼厥
所生所生賢遺教施安上治民化風移創造帝基洪業
垂於鑠明明時赫戲功濟萬世定二儀定二儀雲澤雨
施海外風馳

時運多難

改擁離為時運多難言宣帝致討吳方有征無
戰也凡十二句

時運多難道教痛天地變化有盈虛蠢爾吳蠻虎視江湖我皇赫斯致天誅有征無戰弭其圖天威橫被廓東隅

景龍飛

改戰城南為景龍飛言宣帝克明威教賞從夷
逆祚隆無疆崇此洪基也凡二十一句

景龍飛御天威聰鑒玄察動與神明協機從之者顯逆
之者滅夷文教敷武功巍普被四海萬邦望風莫不來

綏聖德潛斷先天弗違弗違祥享世永長猛以致寬道
化光赫明明祚隆無疆帝緒維期有命既集崇此洪基
平玉衡

改巫山高為平玉衡言景帝一萬國之殊風齊
四海之乖心禮賢養士而纂洪業也凡十三句
平玉衡糾姦回萬國殊風四海乖禮賢養士羈御英雄
思心齊纂戎洪業崇皇階品物咸亨聖敬日躋聰鑒盡
下情明明綜天機

文皇統百揆

改上陵為文皇統百揆言文帝始統百揆用人
有序以敷太平之化也凡二十三句

文皇統百揆繼天理萬方武將鎮四隅英佐盈朝堂謀
言協秋蘭清風發其芳洪澤所漸潤礫石為珪璋大道
侔一作謀五帝盛德踰三王咸光大上參天與地並一作至

化無內外無內外六合並康乂並康乂遘茲嘉會在昔
羲與農大晉德斯邁鎮征及諸州為蕃衛元功濟四海

洪烈流萬世

因時運

改將進酒為因時運言文帝因時運變聖謀潛施解長蛇之交離羣桀之黨以武濟文審其大計以邁其德也凡十句

因時運聖策施長蛇交解羣桀離勢窮奔吳虎一作騎厲惟武進審大計時邁其德清一世

惟庸蜀

改有所思為惟庸蜀言文帝既平萬乘之蜀封
建萬國復五等之爵也凡二十六句

惟庸蜀僭號天一隅劉備逆帝命禪亮承其餘擁衆數十萬闕隙乘我虛驛騎進羽檄天下不遑居姜維屢寇邊隴上為荒蕪文皇愍斯民歷世受辜辜外謨蕃屏臣
內謀衆士夫爪牙應指授腹心獻一作良圖良圖協成

文大

一作乃

興百萬軍雷鼓震地起猛勢陵浮雲逋虜畏

天誅面縛造壘門萬里同風教逆命稱妾臣光建五等

紀綱天人

天序

改芳樹為天序言聖皇應歷受禪洪濟大化用人各盡其才也凡十五句

天序歷應受禪承靈祐御羣龍勒螭虎洪濟大化英雋作輔明明統萬機赫赫鎮四方咎繇稷契之疇協蘭芳禮王臣覆兆民化之如天與地誰敢愛其身

大晉承運期

改上邪為大晉承運期言聖皇應籙受圖化象
神明也凡十四句

大晉承運期德隆聖皇時清宴白日垂光應籙圖陟帝
位繼天正玉衡化行象神明至哉道隆虞與唐元首敷
洪化百僚股肱並忠良民太康隆隆赫赫福祚盈無疆
金靈運

改君馬黃為金靈運言晉承金運聖皇踐祚致
敬宗廟而孝道行於天下也凡三十六句

金靈運天符發聖徵見參日月惟我皇體神聖受魏禪
應天命皇之興靈有徵登大麓仰萬乘皇之輔若闕虎
爪牙奮莫之禦皇之佐讚清化百事理萬邦賀神祇應
嘉瑞章恭享禮薦先皇樂時奏磬管鏘鼓淵淵鐘煌煌
尊樽俎實玉觴神歆享咸悅康宴孫子祐無疆大孝蒸
蒸德教被萬方

於穆我皇

改雉子班為於穆我皇言聖皇受命德合神明

也凡三十五句

於穆我皇盛德聖且明受禪君世光濟羣生普天率土
莫不來庭顒顒六合內望風仰泰清萬國雍雍興頌聲
大化洽地平而天成七政齊玉衡惟平峨峨佐命濟濟
羣英夙夜乾乾萬機是經雖治興匪荒寧謙道光沖不
盈天地合德日月同榮赫赫煌煌曜幽冥三光克從於
顯天垂景星龍鳳臻甘露宵零肅神祇祇上靈萬物欣
戴自天效其成

仲春振旅

改聖人出為仲春振旅言大晉申文武之教畋獵以時也凡二十一句

仲春振旅大致民武教于時日新師執提工執鼓坐作起一作從節有序盛矣允文允武蒐田表禡申法誓遂圍

禁獻社祭允以時明國制文武並用禮之經列車如戰大教明古今誰能去兵大晉繼天濟羣生

夏苗田

改臨高臺為夏苗田言大晉畋狩順時為苗除害也凡二十二句

夏苗田運將徂軍國異容文武殊乃命羣吏撰車徒辨其號名讚契書王軍啓八門行同上帝居時路建大麾雲旗翳紫虛百官象其事疾則疾徐則徐回衡旋軫罷陣弊車獻禽享祀蒸蒸配有虞惟大晉德參兩儀化雲敷

仲秋獮田

改遠如期為仲秋獮田言大晉雖有文德不廢
武事順時以殺伐也凡二十一句

仲秋獮田金德常剛涼風清且厲凝露結為霜白藏司
辰蒼隼時鷹揚鷹揚猶尚父順天以殺伐春秋時序雷
霆振一作威曜進退由鉦鼓致禽祀祔羽毛之用充軍

府赫赫大晉德芬烈陵三五敷化以文雖安一作治不廢
武光宅四海永享天之祐

順天道

改石留為順天道言仲冬大閱用武修文大晉
之德配天也凡二十九句

順天道握神契三時示講武事冬大閱鳴錫振鼓鐸旌
旗象虹霓文制其中武不窮武動軍誓衆禮成而義舉
三驅以崇仁進止不失其序兵卒練將如闕虎惟闕虎
氣陵青雲解圍三面殺不殄羣偃旌麾班六軍獻享蒸
修典文嘉大晉德配天祿報功爵俟賢饗燕樂受茲百
祿嘉萬年

唐堯

改務成為唐堯言聖皇陟帝位德化光四表也

凡二十句

唐堯諮務成謙謙德所興積漸終光大履霜致堅冰神
明道自然河海猶可凝舜禹統百揆元凱以次升禪讓
應天歷睿聖世相承我皇陟帝位平衡正準繩德化飛
四表祥氣見其徵興王坐俟旦亡主一作恬自矜一作主
致遠由近始覆簣成山陵披圖按先籍有其證靈液

玄雲

玄雲仍漢舊名言聖皇用人各盡其材也凡二

十八句

玄雲起丘山祥氣萬里會龍飛何蜿蜒鳳翔何颺颺昔
在唐虞朝時見青雲際今親遊萬一作方國流光溢天外

鶴鳴在後園清音隨風邁成湯隆顯命伊摯來如飛周

文獵渭濱遂載呂望歸符合如影響先天天弗違輟耕

綜時一作地網解褐衿天維元功配二王芬馨世所稀我

皇敘羣才洪烈何巍巍桓桓征四表濟濟理萬機神化
感無方髦才盈帝畿不顯惟昧旦日新孔所咨茂哉明
聖一作人德日月同光輝

伯益

改黃爵行為伯益言赤鳥銜書有周以興今聖
皇受命神雀來也凡二十八句

伯益佐舜禹職掌山與川德侔十六相思心入無間智
理周萬物下知衆鳥言黃雀應清化翔集何翩翩和鳴

棲庭樹徘徊雲日間夏桀為無道密網施山河酷祝振
織網當奈黃雀何殷湯崇天德去其三面羅逍遙羣飛
來鳴聲乃復和朱雀作南宿鳳凰繞羽羣赤鳥銜書至
天命瑞周文神雀今來遊為我受命君嘉祥致天和膏
澤降青雲蘭風發芳氣闔世同其芬

釣竿

釣竿仍漢舊名言聖皇德配堯舜又有呂望之
佐以濟天功致太平也凡二十八句

釣竿何冉冉甘餌芳且鮮臨川運思心微綸沈九淵太
公寶此術乃在靈秘篇機變隨物移精妙貫未然游魚
驚著釣潛龍飛戾天戾天安所至撫翼翔太清太清一
何異兩儀出渾成玉衡正三辰造化賦羣形退願輔聖
君與神合其靈我君宏遠略天人不足并天人初并時
昧昧何芒芒日月有徵兆文象興二皇蚩尤望生民黃
帝用兵征萬方逮夏禹而德衰三代不及虞與唐我皇
聖德配堯舜受禪即祚享天祥率土蒙祐靡不肅庶事

康庶事康穆穆明明荷百祿保無極永泰平

晉凱歌

案晉書樂志曰永平三年官之司樂其有短簫之樂者則所謂王師大捷令軍中凱歌者也又曰鼓角橫吹曲鼓按周禮以鼗鼓鼓軍事角說者云蚩尤氏帥魑魅與黃帝戰於涿鹿帝乃命始吹角為龍鳴以禦之据此鼓角橫吹殆即凱歌之屬也晉有命將出征歌勞還師歌一則遣之出一則勞其歸凡二章張華

造

命將出征歌

案詩有六月有采芑一命尹吉甫一命方叔皆
命將出征之作也張華此詩蓋六月采芑之意
凡二十句

重華隆帝道戎蠻或不賓徐夷興有周鬼方亦違殷今
在盛明世寇虐動四垠豺狼染牙爪羣生號穹旻元帥
統方夏出車撫涼秦衆貞必以律臧否實在人威信加

殊類疎逖思自親單醪豈有味挾纊感至仁武功尚止
戈七德美安民遠跡由斯舉永世無風塵

勞還師歌

案詩出車勞還師也杜杜勞還役也此云勞還
師殆合師與役而通用之歟鄭氏曰遣將帥及
戍役同歌同時欲其同心也反而勞之異歌異
日殊尊卑也觀此則張華猶未達先王之微意
矣凡二十句

獬豸背天德構亂擾邦畿戎車震朔野羣師贊皇威將
士齊心膂感義忘其私積勢如韞弩赴節如發機囂聲
動山谷金光耀素暉揮戈陵勁敵武步蹈橫屍鯨鯢皆
授首北土永清夷昔往冒隆暑今來白雪霏征夫信勤
瘁自古詠采薇收榮於含爵燕喜在凱歸

宋鼓吹鐃歌

案宋書樂志曰鼓吹鐃歌四篇今惟有上邪晚芝艾
如張三篇其一篇闕古今樂錄曰上邪曲四解晚芝

曲九解漢曲有遠期疑是也艾如張三解沈約云樂人以音聲相傳訓詁不可復解凡古樂錄皆大字是辭細字是聲聲辭合寫故致然爾按此鼓吹鏡歌其句讀難定姑存其辭

上邪曲

四解

大竭夜烏自云何來堂吾來聲烏奚姑悟姑尊盧聖子黃尊來饒清嬰烏白日為隨來郭吾微令吾

應龍夜烏由道何來直子為烏奚如悟姑尊盧雞子聽

烏虎行為來明吾微令吾

詩則夜烏道祿何來黑洛道烏奚悟如尊爾尊盧起黃
華烏伯遼為國日忠雨令吾

伯遼夜烏若國何來日忠雨烏奚如悟姑尊盧面道康

尊錄一作錄龍永烏赫赫福祚夜音微令吾

晚芝曲九解

幾令吾幾令諸韓亂發正令吾

幾令吾諸韓從聽心令吾若里洛何來韓微令吾

尊盧忌盧文盧子路子路為路雞如文盧炯烏諸祚微
令吾

幾令諸韓或公隨令吾

幾令吾幾諸或言隨令吾黑洛何來諸韓微令吾

尊盧安成隨來免路路子為吾路奚如文盧炯烏諸祚
微令吾

幾令吾幾諸或言隨令吾

幾令吾諸或言幾苦黑洛何來諸韓微令吾

導盧公洪隨來免路子子路子為路奚姑文盧炯烏諸
祚微令吾

艾如張曲 三解

幾令吾呼歷舍居執來隨咄武子邪令烏銜針相風其
右其右

幾令吾呼羣議破葫執來隨吾咄武子邪令烏今烏今
瞋入海相風及後

幾令吾呼無公赫吾執來隨吾咄武子邪令烏無公赫

吾娒立諸布始布

鼓吹饒歌

案宋書樂志曰鼓吹饒歌十五篇何承天於義熙末私造據此諸曲未嘗被於弦歌也雖仍漢曲舊名大抵別增新意故其義與古詞考之多不合然樂以時新正可存之以備參考云一曰朱路二曰思悲公一作裴公三曰雍離四曰戰城南五曰巫山高六曰上陵者七曰將進酒八曰君馬九曰芳樹十

曰有所思十一曰雉子遊原澤十二曰上邪十三
曰臨高臺十四曰遠期十五曰石流凡十五章何
承天造

朱路篇

朱路揚和鸞翠蓋耀金華玄牡飾樊纓流旌拂飛霞雄
戟闢曠塗班劍翼高車三軍且莫喧聽我奏鐃歌清鞞
驚短簫朗鼓節鳴笳人心惟愷豫茲音亮且和輕風起
紅塵淳瀾發微波逸韻騰天路積響結城阿仁聲被八

表威震振九遐嗟嗟介冑士勗哉念皇家

思悲公篇

思悲公懷袞衣東國何悲公西歸公西歸流二叔幼主
既悟偃禾復偃禾復聖志申營都新邑從斯民從斯民
德惟明制禮作樂興頌聲興頌聲致嘉祥鳴鳳爰集萬
國康萬國康猶弗已握髮吐食下羣士惟我君繼伊周
親覩盛世復何求

雍離篇

雍士多離心荆民懷怨情二凶不量德構難稱其兵王
人銜朝命正辭糾不庭上宰宣九伐萬里舉長旌樓船
掩江濱駟介飛重英歸德戒後夫賈勇尚先鳴逆徒既
不濟愚智亦相傾霜降未及染鄢郢忽已清西川無潛
鱗北渚有奔鯨凌威致天府一戰夷三城江漢被美化
宇宙歌太平惟我東郡民曾是深推誠

戰城南篇

戰城南衝黃塵丹旌電燄鼓雷震勅敵猛戎馬殷橫陣

亘野若屯雲伏大順應三靈義之所感士忘生長劍擊
繁弱鳴飛鏑炫晃亂奔星虎騎躍華旄旋朱火延起騰
飛烟驍雄斬高旗塞長角浮呌響清天夷羣寇殪逆徒
餘黎沾惠詠來蘇奏愷樂歸皇都班爵獻俘邦國娛

巫山高篇

巫山高三峽峻青壁千尋深谷萬仞崇巖冠靈林冥冥
山禽夜響晨猿相和鳴洪波迅瀘載逝載停悽悽商旅
之客懷苦情在昔陽九皇綱微李氏竊命宣武耀靈威

蠢爾逆縱復踐亂機王旅薄伐傳首來至京師古之為
國惟德是貴力戰而虐民鮮不顛墜矧乃叛戾伊胡能
遂咨爾巴子無放肆

上陵者篇

上陵者相追攀被服纖麗振綺紈携童幼升崇巒南望
城闕鬱盤桓王公第通衢端高麗華屋列朱軒臨濬谷
掇秋蘭士女悠奕映隰原指營丘感牛山夾鳩既沒景
君歎嗟歲聿逝不還志氣衰沮玄鬢班野莽宿墳土乾

顧此纍纍中心酸生必死亦何怨取樂今日展情懽

將進酒篇

將進酒慶三朝備繁禮慶嘉肴榮枯換霜霧交緩春帶
命朋僚車等旗馬齊鑣懷溫克樂林濠士失志愠情勞
思旨酒寄遊遨敗德人甘醇醪耽長夜或淫妖興屢舞
厲哇謠形傜傜聲號呶首既濡志亦荒性命夭國家亡
嗟後生節酣觴匪酒辜孰為殃

君馬篇

君馬麗且閑揚鑣騰逸姿駿足躡流景高步追輕飛冉
冉六轡柔奕奕金華暉輕霄翼羽蓋長風靡淑旗願為
范氏驅雍容步中畿豈効詭遇子馳騁趣危機鈇陵策
良駟造父為之悲不怨吳坂峻但恨伯樂稀赦彼岐山
盜實濟韓原師奈何漢魏主縱情營所私疲民甘藜藿
廐馬患盈肥人畜賀厥養蒼生將焉歸

芳樹篇

芳樹生北庭豐隆正徘徊翠穎陵冬秀紅葩迎春開佳

人閑幽室惠心婉以諧蘭房掩綺幌綠草被長階日夕
遊雲際歸禽命同棲皓月盈素景涼風拂中閨哀絃理
虛堂要妙清且悽嘯歌流激楚傷此碩人懷梁塵集丹
帷微颺揚羅袿豈怨嘉時暮徒惜良願奢

有所思篇

有所思思昔人曾閔二子善養親和顏色奉昏晨至誠
烝烝通明神鄒孟軻為齊卿稱身受祿不貪榮道不用
獨擁楹三徙既諄禮義明飛鳥集猛獸附功成事畢乃

更娶哀我生邁凶旻幼罹荼酷備艱辛慈顏絕見無因
長懷永思託丘墳

雉子遊原澤篇

雉子遊原澤幼懷耿介心飲啄雖勤苦不願棲園林古
有避世士抗志清霄岑浩然寄卜肆揮棹通川陰逍遙
風塵外散髮撫鳴琴卿相非所盼何況於千金功名豈
不美寵辱亦相尋冰炭結六府憂虞纏胸襟當世須大
度量已不克任三復泉流誠自驚良已深

上邪篇

上邪下難正衆枉不可矯音和響必清端影緣直表大
化揚仁風齊人猶偃草聖王既已沒誰能洪至道開春
湛柔露代終肅嚴霜承平貴孔孟政弊侯申商孝公明
賞罰六世猶克昌李斯肆濫刑秦民所以亡漢宣隆中
興魏祖寧三方譬彼針與石效疾而稱良行葦非不厚
悠悠何詎央琴瑟時未調改絃當更張矧乃治天下此
要安可忘

臨高臺篇

臨高臺望天衢
颺然輕舉陵太虛
携列子超帝鄉
雲衣雨帶乘風翔
肅龍駕會瑤臺
清暉浮景溢蓬萊
濟四海濯洧盤佇立
雲岳結幽蘭
馳迅風遊炎州
願言桑梓思舊遊
傾霄蓋靡電旌
降彼天塗積窈冥
辭仙族歸人羣
懷忠抱義奉明君
任窮達隨所遭
何為遠想令心勞

遠期篇

遠期千里客
肅駕候良辰
近命城郭友
具爾惟懿親
高

門啟雙闥長筵列嘉賓中堂儻六佾三廂羅樂人簫管
激悲音羽毛揚華文金石響高宇絃歌動梁塵修標多
巧捷九劔亦入神遷善自雅調成化由清均主人垂隆
慶羣士樂亡身願我聖明君邇期保萬春

石流篇

石上流水湔湔其波發源幽岫永歸長河瞻彼逝者歲
月其偕子在川上惟以增懷嗟我殷憂載勞寤寐遘此
百罹有志不遂行年倏忽長勤是嬰永言沒世悼茲無

成幸遇開泰沐浴嘉運緩帶安寢亦又何愠古之為仁
自求諸已虛情遙慕終於徒已

齊鼓吹曲

案齊永明八年謝朓奉鎮西隨王教於荊州道中作
鼓吹十曲一曰元會曲二曰郊祀曲三曰鈞天曲四
曰入朝曲五曰出藩曲六曰校獵曲七曰從戎曲八
曰送遠曲九曰登山曲十曰泛水曲鈞天已上三曲
頌帝功也校獵以上三曲頌藩德也凡十章謝朓造

元會曲

二儀啟昌歷三陽

一作朝

應慶期珪贄紛成序鞮譯憬來

思分階艷組練充庭羅翠旗觴流白日下吹謚景雲滋

天儀穆藻殿萬寓壽

一作慶

皇基

郊祀曲

六宗禋祀岳五峙奠甘泉整蹕遊九闕清簫開八壠鏘
鏘玉鑾動溶溶金陣旋郊宮光已屬

音注

升柴禮既虔福

響靈之集南岳固斯年

鈞天曲

案史記趙簡子疾五日不知人居二日半簡子寤語大夫曰我之帝所甚樂與百神遊於鈞天廣樂九奏萬舞鈞天之名蓋取諸此

高宴浩天臺置酒迎風觀笙鏞禮百神鐘石動雲漢瑤

臺

一作堂

琴

一作寶

瑟驚綺席舞衣散威鳳來參差玄鶴起

一作去

流亂已慶明庭樂詎慙南風彈

入朝曲

江南佳麗地金陵帝王洲逶迤帶綠水迢遞起朱樓飛
甍夾馳道垂楊蔭御溝凝笳翼高蓋疊鼓送華輶獻納
雲臺表功名良可收

出藩曲

雲披紫微內分組承明阿飛臙遊

一作遊

極浦旌節去關

河眇眇蒼山色沉沉遠

一作寒

水波饒音巴渝曲簫管盛

唐歌大君邁遺德江漢仰清和

校獵曲

凝霜冬十月殺盛涼颼哀

一作開

原澤曠千里騰騎紛

一作

絡

往來平置望烟合烈火從風迴殪獸華容浦張樂荆

山臺虞人昔有諭明明時戒哉

從戎曲

選旅亂輶轅弭節赴

一作超

河源日起霜戈照風迴連騎

翻紅塵朝夜合黃河萬里昏寥戾清笳嘯蕭條邊馬煩
自勉輟耕願征役去何言

送遠曲

北梁辭歡宴南浦送佳人方衢控龍馬平路騁朱輪瓊
筵妙舞絕桂席羽觴陳白雲丘陵遠山川時未因一為
清吹激潺湲傷別巾

登山曲

天明開秀嶠瀾光媚碧隄風盪颺鶯辭

一作翻鶯行

雲華

一作

飛芳樹低暮春春服美遊駕凌

一作躡

丹

一作石

梯升嶠

既

小魯登巒且悵齊王孫尚遊行蕙草正萋萋

泛水曲

玉露

一作霜

霑翠葉金風鳴素枝罷遊平樂苑泛鷗昆明

池旌

一作羽

旗散容裔簫管

一作鼓

吹參差日晚厭遵渚採

菱贈清漪百年如流水寸心寧共知

梁鼓吹曲

案鼓吹之樂宋齊並用漢曲竄易其名以實當代之
事其充庭用十六曲梁高乃去其四存其十二合四
時之數也隋書樂志曰梁高祖制鼓吹新歌十二曲
一曰木紀謝二曰賢首山三曰桐栢山四曰道亡五

曰忱威六曰漢東流七曰鶴樓峻八曰昏主恣淫慝
九曰石首局十曰期運集十一曰於穆十二曰惟大
梁亦皆改漢曲易新名凡十二章沈約造

木紀謝

隋書樂志曰漢第一曲朱鷺改為木紀謝言齊
謝梁升也

木紀謝火

一作炎

運昌炳南陸耀炎光民去癸鼎歸梁鮫

魚出慶雲翔轡五帝軼三王德無外化溥將仁蕩蕩義

湯湯浸金石達昊蒼橫四海被八荒舞干戚垂衣裳對
天眷坐巖廊允有錫祚無疆風教遠禮容盛感人神宣
舞詠降繁祉延嘉慶

賢首山

漢第二曲思悲翁改為賢首山言武帝破魏軍
於司部肇王迹也

賢首山險而峻乘峴憑臨胡陣騁奇謀

一作謨

奮卒徒斷

白馬塞飛狐殪日逐殲骨都乃谷蠡馘林胡草既潤原

亦塗輪無反幕有烏掃殘孽震戎逋揚凱奏展歡酺詠
杖杜旋京吳

桐栢山

漢第三曲艾如張改為桐栢山言武帝牧司王
業彌章也

桐栢山淮之首肇基帝迹遂光區有大震邊關殪獯醜
農旣勸民惟阜穗充庭稼盈畝迨嘉辰藁芳糗納寒場
為春酒昭景福介眉壽天斯長地斯久化無極功無朽

道亡

漢第四曲上之回改為道亡言東昏喪道義師起樊鄧也

道亡數極歸永元悠悠兆庶盡含冤沉河莫極皆無安
赴海誰授矯龍翰自樊漢仙波流水清且瀾救此倒懸
拯塗炭誓師劉旅赫靈斷率茲八百驅十亂登我聖明
由多難長夜杳冥忽云旦

忱威

漢第五曲擁離改為忱威言破加湖元勲建也

忱威授律命蒼兕

一作鬼

言薄加湖灌秋水迴瀾滯泊汎

增雉爭河投岸掬盈指犯办嬰戈洞流矢資此威

一作盛

烈齊文軌

漢東流

漢第六曲戰城南改為漢東流言義師克魯山

城也

漢東流江之汭逆徒蜂聚旌旗紛蔽仰振威靈乘高騁

銳至仁解網窮鳥入懷因此龍躍言登泰階

鶴樓峻

漢第七曲巫山高改為鶴樓峻言平郢城兵威
無敵也

鶴樓峻連翠微因巖設險池永歸脣亡齒懼薄言震耀
靈威凶衆稽顙天不能違金湯無所用功烈長巍巍
昏主恣淫慝

漢第八曲上陵改為昏主恣淫慝言東昏政亂

武帝起義平九江姑孰大破朱雀伐罪弔民也
昏主恣淫慝皆曰自昌盛上仁矜億兆誓師為請命既
齊丹浦戰又符甲子辰龕難伐有罪伐罪弔斯民悠悠
萬姓於此覩陽春

石首局

漢第九曲將進酒改為石首局言義師平京城
仍廢昏定大事也

石首局北墉堽新堞嚴東壘峻共表裏遙相鎮矢未飛

鼓方振競銜壁並興櫬酒池擾象廊震同伐謀兼善陣
闢應和掃煨燼翦庶惡靡餘允

期運集

漢第十曲有所思改為期運集言武帝膺錄受

禪德盛化遠也

期運集惟皇膺

一作應

寶符龍躍清漢渚風起方

一作城南城

隅謳歌共適夏訟獄兩違朱二儀起佳

一作嘉

祚千載猶

旦暮舞蹈流帝功金玉

一作石

昭王度

於穆

漢第十一曲芳樹改為於穆言大梁闡運君臣
和樂休祚方遠也

於穆君臣君臣和以肅關王道定天保樂均靈囿宴同

在鎬前庭

一作庭前

懸鼓鐘左右列笙鏞纓佩俯仰有則備

禮容翔振鷺騁羣龍隆周何足擬遠與唐比蹤

惟大梁

漢第十二曲上邪改為惟大梁言梁德廣運仁

化洽也

惟大梁開運受錄膺圖君八極

一作應天
冠八極

冠帶被五都

四海並和會排闥疑塞無異塗

隋凱樂歌辭

案仁壽初詔牛洪等改定樂詞其凱樂歌一述帝德
二述諸軍用命三述天下太平凡三章

述帝德

於穆我后睿哲欽明膺天之命載育羣生開元創歷邁

德垂聲朝宗萬寓祇事百靈煥乎皇道昭哉帝則惠政
滂流仁風四塞淮海未賓江湖背德運籌必勝濯征斯
克八荒霧卷四表雲褰雄圖盛畧邁後光前寰區已泰
福祚方延長歌凱樂天子萬年

述諸軍用命

帝德遠覃天維宏布功高雲天聲隆韶護惟彼海隅未
從王度皇赫斯怒元戎啟路桓桓猛將赳赳英謨攻如
燎髮戰似摧枯救茲塗炭克彼妖逋塵清兩越氣靜三

吳鯨鯢已夷封疆載闢班馬蕭蕭歸旌奕奕雲臺表効
司勲紀績業並山河道固金石

述天下太平

阪泉軒德丹浦堯勲始實以武終乃以文嘉樂聖主大
哉為君出師命將廓定重氛車軌既并干戈是戢洪風
設教政成人立禮樂聿興衣裳載緝風雲自美嘉祥爰
集皇皇聖政穆穆神猷牢籠虞夏度越姬劉日月比耀
天地同休永清四野長帝九州

唐凱樂歌辭

案唐書樂志曰唐制凡命將出征有大功獻俘馘其
凱樂用鐃吹二部樂器有笛簫篳篥簫笛鐃鼓歌七種
迭奏破陣樂等四曲一破陣樂二應聖期三賀聖歡
四君臣同慶樂初太宗平東都破宋金剛其後蘇定
方執賀魯李勣平高麗皆備軍容凱歌以入而貞觀
顯慶開元禮並無儀注太常舊有破陣樂應聖期兩
曲歌辭至太和三年始具儀注又補撰二曲凡四章

破陣樂

案太宗為秦王時征伐四方人間歌謠秦王破
陣樂之曲及即位使呂才協音律李百藥等製
歌詞百二十人披甲持戟甲以銀飾之發揚蹈
厲聲韻慷慨宴享奏之而獻俘即為凱樂焉

受律辭元首相將討叛臣咸歌破陣樂共賞太平人

應聖期

聖德期昌運雍熙萬寓清乾坤資化育海嶽共休明闢

土欣耕稼銷戈遂偃兵殊方歌帝澤執贄賀昇平

賀聖歡

四海皇風被千年德水清戎衣更不著今日告功成

君臣同慶樂

主聖開昌歷臣忠奉大猷君看偃革後便是太平秋
唐鼓吹鐃歌

自漢有鼓吹鐃歌曲魏晉以來相襲為之皆以頌時
主之功德唐無其詞惟柳宗元作鼓吹鐃歌十二曲

以紀高祖太宗功德及征伐勤勞之事然此諸曲史
書不載疑宗元進於元和間謫永州之時故不被於
絃歌如何承天之造宋饒歌云爾然正可存之以備
一朝典故一曰晉陽武二曰獸之窮三曰戰武牢四
曰涇水黃五曰奔鯨沛六曰苞枿七曰河右平八曰
鐵山碎九曰靖本邦十曰吐谷渾十一曰高昌十二
曰東蠻凡十二章皆柳宗元造

晉陽武

晉陽武言隋亂既極唐師起晉陽平姦豪為生
人義主以仁興武也

晉陽武奮義威煬之渝德言歸氓畢屠綏者誰皇烈烈
專天機號以仁揚其旗日之昇九土晞斥田圻流洪輝
有其二翼餘隋斲梟驚連熊螭枯以肉勅者羸后土蕩
玄穹彌合之育莽然施惟德輔慶無期

獸之窮

獸之窮言李密自邙山之敗其下皆貳霸王之

業知天授在唐遂歸於有道享我爵命也

獸之窮奔大麓天厚黃德狙獷服甲之橐弓弭矢箠皇
旅靖敵愈覺自亡其徒匪予戮屈贊猛虔慄慄縻以尺
組噉以秩黎之陽土茫茫富兵戎盈倉箱乏者德莫能
享驅豺兕授我疆

戰武牢

戰武牢言太宗討王世充竇建德助逆師奮擊
武牢下擒之遂降充也

戰武牢動河朔逆之助圖犄角怒轂麋抗喬嶽翹萌芽
傲霜電王謀內定申掌握鋪施芟夷二主縛憚華戎廓
封畧命之曹卑以斲歸有德惟先覺

涇水黃

涇水黃言薛舉據涇以死其子仁杲尤勇以暴
師平之也

涇水黃隴野茫負太白騰天狼有鳥鷖立羽翼張鉤喙
決前距一作鉅超傍怒飛饑嘯翮不可當老雄死子復良

巢岐飲渭肆翱翔頓地紘提天綱列缺掉幟招搖耀鉞
鬼神來助夢嘉祥腦塗原野魄飛揚星辰復恢一方

奔鯨沛

奔鯨沛言輔氏憑江淮竟東海命將平之也

奔鯨沛盪海垠吐霓翳日腥浮雲帝怒下顧哀墊昏受
以神柄推元臣手援天矛截修鱗披攘蒙霧開海門地
平水靜浮天垠羲和顯耀乘清氛赫炎溥暢融大鈞

苞枿

苞枿言梁之餘保荆衡巴巫窮南越良將取之
不以師也

苞枿黜矣惟根之蟠彌已蔽荆負南極以安曰我舊梁
氏緝綏艱難江漢之阻都邑固以完聖人作神武用有
臣勇智奮不以衆投跡死地謀猷縱化敵為家慮則中
浩浩海裔不威而同係縲降王定厥功澶漫萬里宣唐
風蠻夷九譯咸來從凱旋金奏象形容震赫萬國罔不
龔共

河右平

河右平言李軌保河右師臨之不克變或執以降也

河右澶漫頑為之魁王師如雷震昆崙以積上聳下聽
驚不可迴助讐抗有德惟人之災乃潰乃奮執縛歸厥
命萬室蒙其仁一夫則病濡以鴻澤皇之聖威畏德懷
功已定順之于理物咸遂其性

鐵山碎

鐵山碎言突厥之大古夷狄莫強焉師大破之
降其國告於廟也

鐵山碎大漠舒二虜勁連穹廬背北海專坤隅歲來侵
邊或傳于都天子命元帥奮其雄圖破定襄降魁渠窮
竟窟宅斥余吾百蠻破膽邊氓蘇威武輝耀明鬼區利
澤彌萬祀功不可踰官臣拜首惟帝之謨

靖本邦

靖本邦言劉武周敗裴寂咸有晉地太宗滅之

也

本邦伊晉惟時不靖根柢之搖枝葉攸病守臣不任勦
於神聖惟越之興剪焉則定洪惟我理式和以敬羣頑
既夷庶績咸正皇謩載大惟人之慶

吐谷渾

吐谷渾言李靖滅吐谷渾於西海上也

吐谷渾疆盛背西海以夸歲侵擾我疆退匿險且遐帝
謂神武師往征靖皇家烈烈旆其旗熊虎雜龍蛇王旅

千萬人銜枚默無譁東刀踰山徼張翼縱漠沙一舉刈
羶腥尸骸積如麻除惡務本根況敢遺萌芽洋洋西海
水威命窮天涯係虜來王都犒樂窮休嘉登高望還師
竟野如春華行者靡不歸親戚謹要遮凱旋獻清廟萬
國思無邪

高昌

高昌言李靖滅高昌也

魏氏雄西北別絕臣外區既恃遠且險縱傲不我虞烈

烈王者師熊螭以為徒龍旗翻海浪驛騎馳坤隅賁育
搏嬰兒一掃不復餘平沙際天極但見黃雲驅臣靖執
長纓智勇伏囚拘文皇南面坐夷狄千羣趨咸稱天子
神往古不得俱獻號天可汗以覆我國都兵戎不交害
各保性與軀


東蠻

東蠻言既克東蠻羣臣請圖蠻夷狀如周書王
會也

東蠻有謝氏冠帶理海中自言我異世雖聖莫能通王
卒如飛翰鵬騫駭羣龍轟然自天墜乃信神武功繫虜
君臣人纍纍來自東無思不服從唐業如山崇百辟拜
稽首咸願圖形容如周王會書永永傳無窮睢盱萬狀
垂咿喞九譯重廣輪撫四海浩浩知皇風歌詩饒鼓間
以壯我元戎



御製律呂正義後編卷一百十一



總校官庶吉士臣張能照

校對官中書臣馮培

謄錄監生臣魏鎔